

se remuer, et il falloit le manier et le porter coe vn enfant.

Pendant il Conseruoit en cet estat vne egalité d'esprit vne resignation, vne Joye et vne douceur admirable, consolant ces chers Compagnons, et les encourageant a souffrir patiemment toutes les fatigues de ce voyage dans l'assurance que Dieu ne les abandonneroit pas apres sa mort; ce fut pendant cette nauigation qu'il commança a s'y preparer plus particulièrement. Il s'entretenoit par diuers Colloques tantost avec nostre Seigneur tantost avec sa sacrée mere, ou avec son ange gardien ou avec tout le paradis, on l'entendoit souuent repeter s[C]es parolles, *credo quod redemptor meus viuit*, ou bien *maria mater gratiæ, mater dei memento mei*, outre sa lecture spirituelle qu'on luy faisoit tous les Jours, il pria sur la fin qu'on luy leust sa meditation de la preparation a la mort qu'il portoit sur luy, il recitoit tous les Jours son breuiare, et quoy qu'il fut si bas que sa veüe et ses forces estoit beaucoup diminuées Il ne cessa point jusqu'au dernier jour de sa vie apres que ses gens luy en eurent faict scrupule.

huit Jours auant sa mort il eut la pensée de faire de l'eau benite po⁹ luy seruir pendant le reste de sa maladie, a son agonie, et a sa sepulture, et il Instruisit ses Compagnons comment il en fa/loit vser.

La veille de son trepas qui fut vn vendredy il leur dit tout Joyeux que ce seroit le lendemain, il les entretint pendant tout ce Jour de ce qu'il y auoit a faire po⁹ son enterrement, de la maniere dont il faloit l'enseuellir, de la place qu'il faloit choisir po⁹ l'enterrer, comment il luy faudroit acomoder les pieds les mains, et le visage, coe ils esleueroient vne